

Isiginnaartitsisarfeqarneq pillugu Inatsisartut inatsisissaattut siunnersuut
Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq

pillugu

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap

ISUMALIUTISSIISSUTAA

Siunnersuutip aappassaaneerneqarnerani saqqummiunneqartoq

Ataatsimiititaliaq suliarinninnermini ukuninnga inuttaqarpoq:

Harald Bianco, Inuit Ataqtigiit, siulittaasoq
Andreas Uldum, Demokraatit, siulittaasup tullia
Juliane Henningsen, Inuit Ataqtigiit
Debora Kleist, Inuit Ataqtigiit, (sinneissusaq)
Ruth Heilmann, Siumut
Doris Jakobsen, Siumut

UKA 2010-mi ulloq 23. september siullermeerinerup kingorna ataatsimiititaliap siunnersuut misissorpaa. Ataatsimiititaliami suliarinninnermut atatillugu isiginnaartitsisarfoqtigiit Silamiut ataatsimiititaliamit takuniaavigineqarput.

Siunnersuutip siunertaa

Inuussutissarsiutigalugu isiginnaartitsinikkut eqqumiitsuliornerup inatsisitigut aalajangersaavigineqarnissaata qulakkeernissaa inatsisip pingaarnertut siunertaraa. Tamanna pissaaq isiginnaartitsisarnermi kulturimut siuarsaasussamik kiisalu inuussutissarsiutigalugu namminerlu kajuminnikkut isiginnaartitsinikkut eqqumiitsuliornermik siuarsaallunilu ineriartortitsissusamik nunatta isiginnaartitsisarfiarik pilersitsinikkut.

Tamanna nunatta isiginnaartitsisarfiarik, suliassanik aalajangersimasunik isumaginninnissamut pisussaaffilerneqartumik pilersitsinikkut pissaaq, taamaattumillu nunatta isiginnaartitsisarfiarik ukiumoortumik aningaasaliissuteqarfigineqartassalluni. Kiisalu aningaasaateqarfinit aningaasaliinerit allatullu avataanit aningaasaliinerit killilersorneqanngitsumik nunatta isiginnaartitsisarfiarit atorineqarsinnaapput.

Nunatta isiginnaartitsisarfiata suliassarissavaa ilinniarnermi ukiunik marlunnik sivilissusilimmi isiginnaartitsisartussanik ilinniartitsineq kiisalu qanorluunniit ukiulinnut tamanut isiginnaartitsinerit tamatigoortut takutittassallugit. Nunatsinnut taamatullu nunanut tamalaanut sammisumik aallaaveqarnissaq nunatta isiginnaartitsisarfiata pisussaaffigaa. Assersuutigalugu angalaarluni isiginnaartitsiartornikkut imaluunniit radiukkut tv-kkullu aallakaatitsinikkut nunatta isiginnaartitsisarfiata isiginnaartitsissusiani nunatsinnut tamarmut takusassiarisassavai. Kiisalu nammineq kajuminnikkut isiginnaartitsisarfinnut najukkanilu ataasiakkaani isiginnaartitsisartoqatigiinnut ilitersuinissamat pisussaaffeqarpoq.

Inatsisartut siunnersuummik siullermeerinerat

Inatsisissatut siunnersuut Inatsisartuni partiinit tamanit tapersersorneqarluarpoq isumaqatigiisutigineqarporlu siunnersuut kulturimut nukittorsaataallunilu ineriartuutaassaaq.

Siunnersuutip tusarniaassutiginera

Siunnersuut ulloq 29. januar 2009-mit ulloq 20. februar 2009-mut tusarniaassutigineqarsimasooq ataatsimiititaliap paasivaa. Taamaallunilu sapaatip akunneri pingasut ullorlu ataaseq tusarniaanermut piffissaliunneqarsimapput. Taama piffissaliineq ataatsimiititaliamit sivikigineqarpoq aammalu tusarniaaffigineqartunut, tusarniaanermut akissummik suliarilluakkamik tunniussinissamat piffissaqartinneqartariaqartunut naammaginarnani. Taamaattumik tusarniaanermut sivilissusumik piffissaliisarnissamik Naalakkersuisut ataatsimiititaliamit kaammattorneqarput.

Ataatsimiititaliamittaaq paasineqarpoq siunnersuutip aningaasaqarnikkut kingunerisasaanik itisiliinerup kingorna siunnersuut Aningaasaqarnermut Naalakkersuisoqarfimmut ulloq 12. julimit 20. juli 2010-mut tusarniaassutigineqaaqqissimasooq.

Ataatsimiititaliap siunnersuummik suliarinninnera

Siunnersuut inersuarmi siullermeerneqarami annertuumik tapersersorneqartoq aammalu siunnersuutip siunertaa imarisaalu tamanit isumaqatigineqartut ataatsimiititaliamit maluginiarneqarpoq.

Naalakkersuisut siunnersuummik saqqummiussinerat siunertamullu aningaasanik pisariaqartunik immikkoortitsisoqarsimanera ataatsimiititaliamit iluarisimaarneqarpoq. Isiginnaartitsisarfeqarneq pillugu inatsit minnerunngitsumillu nunatta isiginnaartitsisarfeqalernissaanut inatsisitigut tunngavissaq sivilissusumik utaqqineqarsimavoq.

Isiginnaartitsisarfik tassungalu illutatigut atugassarititaasut 2013-imi naliliiffigineqassat ataatsimiititaliamit maluginiarneqarpoq. Taamatut naliliinermi atuisut aamma akuutinneqarnissaat pingaaruteqarpoq. Najukkani isiginnaartitsisartoqatigiit aammalu nammineq kajuminnikkut isiginnaartitsisarfiit inatsimmi aamma pineqarnerat puigorneqassanngilaq. Soorluttaaq isiginnaartitsivinnik ingerlatsineq pillugu atuarfinnut ilinniartinnullu ilitersuinissamik nunat-

ta isiginnaartitsisarfia pisussaaffeqartooq. Taamaattumillu nunatta isiginnaartitsisarfiata sullisissutaanik atuisut naliliinermut akuutinneqarnissaat ataatsimiititaliap Naalakkersuisunut kaammattuutigissavaa.

Nunatta isiginnaartitsisarfia isiginnaartitsisartunik ilinniartitsisassaaq. Ilinniartitaanerup nunani avannarlerni allani imaaliallaannarluni inuussutissarsiutaasinnaanera naatsorsuutigineqarsinnaangitsoq Naalakkersuisut allapput. Ilinniartitaanerli nunatta avataani isiginnaartitsisartunik ilinniartitsinermut sapinngisamik annertunerpaamik naleqqussarneqarsinnaangorlugu ilinniarnermik aqqissuussinissamut siunnersuusiornissamut nunatta isiginnaartitsisarfia peqquneqassaaq, taamaaliornikkut isiginnaartitsisartunngorniat nuatsinneersut nunani allani qafasinnerusumik ilinniagaqaqqikkumasut ilinniarnerminnik sivikillisaanneqarsinnaaqqullugit.

Ilinniartitaanermik aqqissuussinissaq naliliinissarlu pillugit malinnaatinneqarnissani ataatsimiititaliap Naalakkersuisunut qinnutigissavaa.

Inatsimmi toqqaannartumik allassimanngikkaluartooq nunatta isiginnaartitsisarfiata pilersinneqarnerani Silamiut tunngaviliisussatut isigineqarput. Taamaalillunilu isiginnaartitsisartutut ilinniarnerp aqqissuunneqarnissaanut isummernissamut tunngavissiamik Silamiut suliarinnissapput. Taamatuttaaq Silamiut init maanna atugaat nunatta isiginnaartitsisarfianut illutartinneqassapput, taamaalillunilu sanaartornissamut immikkut aningaasaliinissaq pisariaqarani.

Inatsisip 1. januar 2011-mi atuutilernissaa naatsorsuutigineqarpoq ullorlu taanna tikitsinnagu nunatta isiginnaartitsisarfiata pilersinneqarnissaata aallartisarneqarnerani suliasat isumagissat annertupput. Isumagissat eqqarsaatigalugit ikaarsaariarnermi aqqissuussinissaq Naalakkersuisut Silamiunut isumaqatigiissutigissagaat ataatsimiititaliap qularinngilaa, taamaalillunilu nunatta isiginnaartitsisarfiarik pilersitsiniarluni sulineq pisariaqanngitsumik kinguarsaqqunagu. Silamiut 2011-mut pilersaarusiortutik suliarisimasaat ikaarsaariarnermi aqqissuussinermi tassani Naalakkersuisunit ilanngullugit isiginiarneqarnissaat ataatsimiititaliamit kissaatigineqarpoq. Taamaalillunilu Silamiunut takusaanermi ataatsimiititaliap paasivaa Silamiut 2011-mut pilersaarusioreerlutillu isumaqatigiissusioreersut aammalu 2012-mut tunngasumik isumaqatigiinniarnit aallartereersimagaat. Ikaarsaariarnermi aqqissuussinermik pilersitsisoqanngippat sulineq taanna maangaannassaaq. Taamaalillunilu ilisimasaminnik, misilittakaminnik aammalu pilersaarutigineqarsimasinnaasunik Silamiut nunatta isiginnaartitsisarfianut ingerlatitseqqinnissaannut ikaarsaariarnermi aqqissuussisoqarnissaa qulakkeerneqartariaqarpoq.

Tamanna tunngavigalugu annertunerusumik oqaaseqarnani ataatsimiititaliap isumaqatigiittup siunnersuut akuerineqassasoq inassutigaa.

Ataatsimiititaliap inassuteqaatai

8. oktober 2010

UKA 2010/17

Siuliani oqaaseqaatigineqartut siullermeerinermilu oqaatigineqartut tunngavigalugit siunnersuut **akuersissutigineqassasoq ataatsimiititaliap isumaqatigiittup inassutigaa.**

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.



Harald Bianco

Siulittaasoq




Andreas Uldum

Siulittaasup tullia



Debora Kleist



Ruth Heilmann



Doris Jakobsen